



Annáll haustannar 2021

Hefð er fyrir því að rita annál eftir hverja önn sem líður hér í Fjölbrautaskóla Vesturlands. Þetta er gamall og góður siður sem seint mun leggjast af þótt sniðið sé síbreytilegt. Annáll er ekki lesinn upp við brautskráningarathöfn eins og áður var gert, en birtur á vef skólans áhugasömum til fræðslu og yndisauka.

Tölulegar upplýsingar

Að vanda hefst annáll þessi á staðreyndum á tölulegu formi. Kennsla á haustönn 2021 hófst miðvikudaginn 18. ágúst. Kennslu- og námsmatsdögum lauk þriðjudaginn 14. desember. Heildarfjöldi nemenda við skólann á haustönn 2021 var 547. Þar af voru 413 nemendur í dagskóla og 134 nemendur í kvöld- og helgarnámi.

Í heildina var kynjaskipting þannig að 61,6% nemenda voru karlar og 38,4% konur. Í dagskólanum var kynjahlutfallið 62% karlar og 38% konur, í dreifnámi var kynjahlutfallið 60% karlar og 40% konur. Í dagskólanum voru flestir á opinni stúdentsbraut eða 142 nemendur. 49 nemendur voru á náttúrufræðibraut og 39 á félagsfræðibraut. 47 nemendur voru á sjúkraliðabraut í dreifnámi. Á iðnnámsbrautum voru 79 nemendur í rafvirkjun í dagskóla, í húsasmíði voru 29 nemendur í dagskóla og 76 í dreifnámi, í vélvirkjun voru 22 nemendur í dagskóla og 19 í dreifnámi.

Skólastarf á haustönn 2021

Að mestu leyti tókst að halda kennslu í staðnámi á liðinni önn. Dagana 3.-9. nóvember þurftum við í snatri að grípa til fjarkennslu vegna hópsmits á Akranesi, en að öðru leyti var skólastarf með nokkuð hefðbundnu sniði.

Nemendur og kennarar í Grundaskóla höfðu áfram afnot af þremur skólastofum á önninni og munu vera hjá okkur til vors.

Hafragrautur var í boði fyrir nemendur og starfsfólk alla morgna án endurgjalds. Örstutt og endurnærandi núvitund var ástunduð í hádeginu alla fimmtudaga með Steinunni Evu, sálfræðikennara. Í Verinu var boðið upp á jafningjafræðslu í stærðfræði tvisvar í viku.

Kynningarfundur með foreldrum nýnema var haldinn 9. september þar sem m.a. var farið yfir námsbrautir og val, stoðþjónustan kynnt og fyrirspurnum um skólastarfið svarað. Annar kynningarfundur með foreldrum og nemendum sem tala pólsku var svo haldinn í október með aðstoð túlks.

Skuggakosningar fóru fram í svokallaðri Lýðræðisviku í september. Stjórnmalaflokkar í Norðvesturkjördæmi sendu sína fulltrúa á hressilegan kosningafund með nemendum, kynntu sig og sín málefni og svo fóru fram kosning innan FVA. Kjörsókn var nálægt 50% sem er afbragðs þátttaka. Kraftur og metnaður einkenndi þetta skemmtilega verkefni, enda lögðu nemendur í kjörstjórn, NFFA, Kristbjörn og kjósendur sig öll fram.

Lilja Dögg Alfreðsdóttir, mennta- og menningarmálaráðherra, heimsótti skólann þann 16. september. Hún hitti nemendur og kennara að máli og leist mjög vel á skólann. Hún var leyst út með gjöf, taflborði sem var handsmíðað af nemendum FVA. Það kom sér vel því það er mikil teft á hennar heimili.

Í byrjun október settu útskriftarefni FVA niður nokkrar harðgerar trjáplöntur í lundi Skógræktarfélag Akraness og verður gaman að fylgjast með þeim vaxa og dafna.

Í nóvember héldu fjórir nemendur ásamt kennara sínum, Helenu Valtýsdóttur, til Sevilla á Spáni til að vinna að verkefninu Green Schools for a Green Future sem FVA er hluti af. Þetta er fyrsta verkefnið í erlendu samstarfi sem kemst til framkvæmda eftir kófið. Að öllu óbreyttu er svo von á nemendum frá skólum í Litháen og Finnlandi fljótlega eftir áramót.

Áfram er haldið með verkefnið Græn skref í ríkisrekstri og bættust tvö skref við á önninni. Þá fékk skólinn áfram grænt ljós á jafnlaunavottun í árslok.

Útskriftarnemendur þáðu morgunkaffi í borðsalnum 2. desember og áttu notalega stund með kennurum og starfsfólki. Síðan var brunað í bæinn með langferðabíl og fer engum sögum af því hvað þar var brallað. Brautskráð er frá FVA laugardaginn 18. desember. Alls útskrifast 45 nemendur af sjö mismunandi námsbrautum.

NFFA

Það lifnaði talsvert yfir félagslífi nemenda á önninni og löngu kominn tími til. Klúbbastarf fór vel af stað og haldin voru kaffihúsa- og spilakvöld. Æfingar eru hafnar á nýrri sýningu hjá leiklistarklúbbnum Melló og standa vonir til að hægt verði að frumsýna eftir áramótin.

NFFA stóð fyrir tvöfaldri nýnemaferð dagana 24. og 25. ágúst. Fyrri daginn fóru nýnemar þessa árs í óvissuferð á Þórisstaði þar sem stjórn NFFA leiddi mannskapinn í hópeflisleiki og skemmtun og bauð upp á hádegisverð. Seinni daginn endurtóku nýnemar síðasta skólaárs leikinn, ári seinna en ætlað var.

Fyrsta ball NFFA frá því covid19 skall á var haldið í Gamla kaupfélaginu 30. september og var uppselt. Mikil spenna var fyrir ballinu enda nemendur búnir að bíða lengi eftir þessu tækifæri. Vegna sóttvarna þurftu nemendur, gæslumenn og starfsfólk á ballinu að fara í hraðpróf fyrir ballið. Það gekk ótrúlega vel, þökk sé kennurum og starfsfólki FVA. Enginn reyndist smitaður og þar af leiðandi gátu ballgestir skemmt sér án grímu og fjarlægðarmarka, öllum til mikillar gleði.

Söngkeppni framhaldsskólanna átti upphaflega að halda í mars en henni varð því miður að fresta. Laugardaginn 9. október var biðin loksins á enda og helstu söngvarar skólaársins 2020-2021 fengu að stíga á svið og keppa fyrir sinn skóla í Hljómahöllinni Reykjanesbæ. Fyrir hönd Fjölbautaskóla Vesturlands kepptu þau Helgi Rafn Bergþórsson og Sigríður Sól Þórarinsdóttir. Fluttu þau lagið Breaking free úr High School Musical og stóðu sig frábærlega.

Aðalstjórn NFFA á haustönn 2021 var skipuð eftirtöldum nemendum: Helgi Rafn Bergþórsson var forseti og með honum í stjórn voru þau Salka Brynjarsdóttir, ritari og varaforseti, Andrea Kristín Ármannsdóttir, gjaldkeri, Marey Edda Helgadóttir, markaðsstjóri, Friðmey Ásgrímsdóttir, skemmtanastjóri og Jól Þór Jóhannesson, fulltrúi nýnema. Eftirtaldir nemendur voru í forsvari fyrir klúbba NFFA: Fannar Björnsson fyrir Tónlistarklúbb, Ingimar Elfar Ágústsson fyrir Kvikmyndaklúbb, Breki Þór Hermannsson fyrir Íþróttaklúbb, Ronja Rut Ragný Hjartardóttir fyrir Femínistafélagið Bríet,

Antonía Líf Sveinsdóttir fyrir Hinseginfélagið, Krístrún Bára Guðjónsdóttir fyrir GEY (Góðgerðarfélagið Eyni), Maren Eir Halldórsdóttir fyrir Hátíðarnefnd, Marta Lind Jörgensdóttir fyrir Leiklistarklúbbinn Melló, Björn Viktor Viktorsson fyrir Viskuklúbbinn, Patrekur Orri Unnarsson fyrir Skutluna og Steinar Daði Hjaltason fyrir Pmax-klúbbinn.

Framkvæmdir

Í rúmgóðu húsnæði er sífellt þörf á viðhaldi og var því sinnt eftir þörfum að vanda. Sérstaklega má telja upp miklar og nokkuð hávaðasamar framkvæmdir sem hafa staðið yfir á neðri hæð B-álm, þar sem stoðþjónusta FVA og kennslustofur eru til húsa. Þegar þeim lýkur verður aðstaðan öll önnur og betri, kennslustofur starfsbrautar verða þrjár í stað tveggja sem hentar starfseminni betur. Tvær skrifstofur fyrir stoðþjónustuna verða samliggjandi og að auki er gert ráð fyrir rúmgóðu viðtals-/fundarherbergi.

Nýjar hleðslustöðvar fyrir rafbíla voru teknar í notkun við Fjölbrautaskóla Vesturlands í október. Nú geta rafbílaeigendur hlaðið bílinn á meðan heilasellurnar fá sína hleðslu inni í skólastofu.

Heilsuefling

Í skólanum starfar sérlega öflugt Heilsueflingarteymi sem hefur á önninni staðið fyrir fjölbreyttum viðburðum og hvatt nemendur og starfsfólk til að huga að heilsunni á ýmsan hátt.

Hin árlega Heilsuvika fór fram dagana 4.-8. október, en þá voru í boði ýmsir heilsueflandi viðburðir t.d. fimleikar, sjósund, göngur, blak, körfubolti og flot, auk þess sem armbeygjukeppni fór fram á sal milli nemenda og starfsfólks (sem lauk með jafntefli). Við fengum líka góða fyrirlesara til okkar í Heilsuvikunni. Pálmi Ragnarsson hitti nemendur á sal og fjallaði m.a. um jákvæð samskipti og mikilvægi þess að tala við alla og gefa öllum vægi, hlusta og hrósa og hafa jákvæð áhrif á aðra. Hann fjallaði líka um orkudrykki og hvað þeir eru í raun óþarfir. Nemendur sátu einnig fyrirlestur hjá Þorgrími Þráinssyni, en hann ráðlagði öllum að láta vaða, þora að láta draumana sína rætast og taka ábyrgð á eigin lífi og heilsu. Hvatti hann nemendur til að vera góð hvert við annað og stefna á að vera betri í dag en í gær.

Önninni lauk svo með vasaljósa-jólagöngu í Álfholtsskógi þar sem genginn var hringur og svo boðið upp á heitt kakó og piparkökur.

Skruddan

Fréttabréfið Skruddan leggur áfram metnað sinn í að koma út vikulega en í Skruddunni eru birtar upplýsingar og fréttir sem eru efst á baugi hverju sinni. Allir geta gerst áskrifendur að Skruddunni og hún er einnig birt á miðlum skólans, vefnum fva.is og á Facebook.

Stoðþjónustan

Þessi önn var fjölbreytt og skemmtileg hjá stoðþjónustu FVA. Helstu verkefni tengdust náms- og starfsferli nemenda ásamt þungum nemendamálum á önninni sem tengjast andlegri líðan þeirra. Að vanda var stoðteymi á tánum vegna líðanar nemenda, fylgdust vel með og veittu ráðgjöf og stuðning. Haldin voru þrjú námskeið um kvíða og prófundirbúning. Aukið var við starfshlutfall skólahjúkrunarfræðings og er það nú hálf starf. Ólöf H. Samúelsdóttir snýr sér alfarið að kennslu um áramót og lætur af störfum sem náms- og starfsráðgjafi við FVA. Munu margir sakna umhyggju hennar í því hlutverki. Hún á heiður skilinn fyrir vel unnin störf í gegnum árin í þágu nemenda FVA.

Í annarlok

Nú þegar senn lýkur fjórðu önn í kófi getum við litið um öxl, horft yfir farinn veg og undrast hvað við komumst langt á einstaklega krefjandi tímum. Núna horfum við björtum augum til framtíðar. Áskoranir hafa verið flóknar og fjölmargar, en með umburðarlyndi og þrautseigju að leiðarljósi höfum náð að halda okkar striki þrátt fyrir allar takmarkanir sem okkur hafa verið settar.